

## Mattheus 6:25-34

- 25 Ik zegge owleu: Maak ow neet naar ovver owzelf, ovver wa-j aeten en drinken zölt, ok neet ovver ow lief en ovver wa-j antrekken zölt. Het laeven is toch maer as ‘t aeten en het lief meer as de klaere?
- 26 Kiek toch naor de voggels in de locht. Zaeien, dat doot ze neet, oogsten ok neet en ze gardt gin spiekers<sup>1</sup> vol bi’jnene. God, owwen hemelsen Vader, göf eur te aeten. Bunt i’jleu neet völle maer waerd as zee?
- 27 Wel van owleu kan deur zich naar te maken zien laeven ok maor ene elle langer maken?
- 28 En wat maak i’jleu ow naar um klaere? Kiek toch es naor de lelies, ho of dee greuit in ‘t veld. Arbeiden, dat doot ze neet, waeven ok neet.
- 29 Ik zegge owleu: zelfs dén Salomo met al zienen pronk leep der neet zo mooi bi’j as zee.
- 30 At no God het gres, dat vandage nog op ‘t veld steet en dat morgen in den aoven esmetten wordt, al zukke mooie klaere an dut, ho zal Hee dat owleu, met ow kleine geleuve (*vertrouwen*), dat dan neet doon?
- 31 Maak ow neet naar deur te denken: “Wat mo-w toch aeten?” Of “Wat mo-w toch drinken?” of: “Wat mo-w ons toch antrekken?”
- 32 Dat bunt dinge waormet de heidenen zich drokmaakt. Owwen hemelsen Vader wet jo, da-j dat allemaole neudig hebt.
- 33 Zeuk lever aerste het koninkriek van God, en het recht dat daorbi’j heurt. En al dat andere zal der ow bi’j egovvene worden.
- 34 Maak ow neet naar ovver de dinge van morgen. Want den dag van morgen zorgt jo wal veur zichzelf. Elken dag hef jo genug an zienen eigen armood.

---

1 Een spieker is een gebouwtjen, waar-t vrogger de rogge en ander zaod in worden op eslagen.